

# 傅斯年·王朝俊·叢溈珠

周邦道

## 當代教育先進傳之十二

### 傅斯年 (1896-1950)

傅斯年，字孟真，山東聊城人。清光緒二十二年丙申二月十三日，生於邑之北門祖宅。祖淦，拔貢生；父旭安，舉人，稱書香世第。十歲，入東昌府立小學堂，十三歲，隨父高弟侯雪舫進士延瑛赴天津，肄業府立中學堂。斯年幼時文史根柢，除其祖父外，受雪舫影響最深。民國二年夏考取國立北京大學預科。五年秋，升本科國文門。時胡適在新青年雜誌發表文學改良芻議等文，提倡白話文學；斯年撰文學革新申義等文以響應之。七年夏，與同學羅家倫、毛準等組織新潮社。八年夏卒業，回籍考取山東省官費留學。冬，赴英國，先至愛丁堡，嗣入倫敦大學，研究實驗心理及生理，兼治數學。十二年夏，由英赴德，在柏林大學哲學院研究。

十五年冬歸國，應國立中山大學戴校長傳賢之聘。翌年春，就任該校教授，兼國文、歷史兩學系主任，嗣更兼文科學長、文學院長。其年夏，在該校創立語言歷史學研究所。十七年春，國立中央研究院蔡元培院長聘其籌設歷史語言研究所。同年十一月九日，以專任研究員兼任所長。

其間曾兼任國民參政會參政員、政治協商會議會員、社會科學研究所所長、國立中央博物院籌備主任、國立北京大學代理校長。三十七年春，復當選為國立中央研究院院士及立法委員。惟畢生心力，實盡瘁於史語所。在其主持所務二十三年中，所徵購及造就研究人才，而先後在所研究歷史、語言、考古、人類諸學之學人近百。刊行專書七十餘種，發表論文五百餘篇，收藏中外圖書達四十餘萬冊。語言實驗、古物發掘、人體測量及民族調查之儀器達百餘種，皆其領導及肇劃之功。二十九年秋，朱家驊繼蔡為院長，斯年任總幹事，雖在職不久，然於院務之發展及院士制度之推行，贊襄之力為多。

三十八年一月二十日，就任國立台灣大學校長，夙夜憂勤，亟謀改進，苦心誘導，力挽橫流。因而教學水準提高，青年思想，趨於正軌，深受師生愛戴，校務得以蒸蒸日上。三十九年十二月二十日出席臺灣省參議會，在會場中猝患腦溢血，溘然而逝，年纔五十有五。士林悼惜！火化

後，骨灰瘞於臺大校門左側，顏曰傳園。花木扶疏，環境清幽，永供諸生及海內外人士之憑弔焉。夫人俞大綵，滬江大學出身，臺大文學院教授。子仁軌，美國哈佛大學畢業。著作刊行專書者，有東北史綱及性命古訓辨證。稿本則有古代中國與民族、古代文學史等。論文百餘篇，由台灣大學輯印為傅孟真先生集。

斯年性秉剛正，學造淵微，憂國公忠，辯才無礙。既善治學，又長任事，實罕觀環才。爾後臺大得於安定中求發展，以至學生之衆，教授之良，院系之多，校舍之廣，為「全臺首學」，足徵其慘澹經始之遺澤矣！

（本國立台灣大學：傅故校長哀輓錄中所載事略及悼念篇章。）

### 王朝俊 (1872-1930)

王朝俊，字璧一，別署鴻一，山東鄆城人。生於清同治十一年壬申。幼失怙，隨母就外家讀。好動，不甘伏案帖囁。縣考期近，趁月夜，坐打麥場滾石上，默誦所讀書，數夕，心境頓瑩朗。應試，竟以案首為附生，人皆異之。性英邁，

有奇氣，體偉聲洪，望之儼然。喜與鄉邑豪俠飲，多結納；以清政竄腐，隱懷革命思想。光緒末，負笈東瀛，肄業宏文學院師範科，入同盟會。目睹日本軍械精良，知揭竿匪易。乃折節學問，欲事實業教育，以養以教，圖富強。歸國，初任曹州首邑荷澤官立高等小學堂教員，繼籌辦普通中學堂，為山東省立第六中學校之權輿。荷澤桑君雄於財，而乏嗣胤，乃勸其捐資興學，成桑氏女塾，倡導風氣，此即公立女子師範學校之前身也。

曹州地瘠，萑苻四伏。朝俊創辦黃庵工藝局，使貧民習藝謀生。另設自新學堂，招匪訓教。初頗安定，洎任省視學，由弟朝儀主持，疏於管教，致屢出劫掠。捕訊實供，知府丁塘不得已拘朝俊。在獄二年，專究陽明知行合一與致良知學說，體認深切；爾後為人治事，胥本乎此。鼎革，同自齊督魯，任朝俊為提學使。朝俊微服，乘三等車晉省，僚案迎迓無所值。比至署，聞者拒不納，迫周見片，始親延入。其儉樸無官習，魯人傳為佳話。

朝俊以曹州小麥稈可製草帽辦，請於周，設曹州善後局主其事，年撥庫帑廿萬兩助之。以是行銷各地，巴拿馬賽會得優等獎。袁氏當國，反對民黨，組織進步黨，強令加入，遂辭職，回任省立第六中學校長。初、揭樂大學之道經文為校訓，後隱括「勤樸誠」三字。歲聘師資，均一時之選。學生勵志讀書，升學率冠全省。提倡體育，組陸軍隊，假日操練。奸人密報為陰謀革命，袁派山東總運使夏繼泉、蓮居調查，如實即正法，幸夏同情保證，事乃寢。

朝俊研幾學問，深覺歐西學術思想，歸本於教育實業；中國學術思想，歸本於教養。歐西學術之精神，是積個人之有餘；中國學術之精神，乃補衆人之不足。積有餘而社會更感不平，補不足而國家方可言均。認定教養化之政治，及倫理化之教育，實為當前先務之急。嘗自言：「吾一生自矢信條，即赤條條而來，復亦赤條條而去；既不顧居功，更不顧居名。……不唯不顧與人爭短長，即學問亦無暇成就得；一本無對無我之精神，盡心力以為之而已」。又言：「吾一生之行動，無論為政為學，皆受此不安之一念所支配」。無對無我，亡功亡名；一念不安，輒勇往直前，為而不有，是誠豪俠丈夫矣！

洪憲既終，朝俊膺選山東省議會議長，兼省立第一中學校長。整頓校務外，聯絡會中同志及實業界人士，組織民治社，於煙台、青州、東昌、濟南等處，創設漁、蠶、棉、礦各項試驗場。又由省議會制定單行法規，飭各縣設立勸業所。事未及半，忽引起軍閥黨派之誤會，致枝節橫生。乃知此項重大問題，非從文化上着手，不易獲得根本之解決。遂去職，移廬北平，組織中華日報社。聘名流劉少少為主筆，嚴蘭亭為編輯，靳鶴聲主持副刊，以宣導「東方文化，西北墾殖」為鵠的。另設西北墾殖處於太僕寺街，移曹屬貧民三千餘人至綏遠河套，又勸電力公司於包頭。「以教以養」之一貫主張，戮力實行，始終無間。復以六中黨遠，尚無高中，乃屬靳鶴聲返濟南，邀朱桂山、孫价人、侯列五、趙蓮塘、宋憲章等籌商，由曹屬十一縣聯款倡導，聘梁漱溟為主任，熊十力、王平叔、王近信、秦亦文等為教員。

與六中繼任校長叢連珠，桴鼓相應。培植既弘，聲譽益溥。私辦高中而附於省校，亦教育史上之異蹟也。

朝俊與黨國元老胡展堂、張溥泉、吳禮卿、陳果夫等皆有舊。民國十九年春，國民政府任為內政部次長，笑語人曰：「吾豈志是哉！」辭未就。閻、馮交惡，應國人請，力疾輟旋，以勞悴過甚，入北平德國醫院，診治罔效，七月二十六日遂不起，年五十有九。門生故舊紛集治喪，諡曰「弘毅先生」。梁漱溟曾為文悼之曰：「今世之一箇真人也」。「吾先民之精神，正唯於先生其人可以見之」。合肥段氏輓句有云：「景略名高捫蝨日，劍南淚灑示兒時」。其丰裁品概，可想見矣！歸葬濟南郊區四里山。子聯坤，治電力，滯居包頭。

（本顏世鏡：王朝俊傳略，梁漱溟：悼王鴻一先生，靳鶴聲：先師王鴻一先生事略。）

## 叢連珠 (1871-1940)

叢連珠，字禾生，山東文登人。世居城內北宮街，為明南京工部尚書太子少保叢蘭之裔孫。生於清同治十年辛未。性寧靜，好學問，弱冠為名諸生，嗣入濟南優級師範學堂第一班。畢業東渡，肄業宏文學院師範科。感於清政不綱，返國與兄灌珠共隸同盟會。辛亥起義，奔走宣傳，多所致力，灌珠慘被清軍釘死院牆。連珠哭之慟，矢以悲憤貫注於教育事業。初任山東省教育廳視學，民國三年冬，繼王朝俊為省立第六中學校長，閱歷艱辛，近三十載，學監郭俊卿、葛象一，先後相助為理，是為其畢生鞠躬盡瘁之名教樂地也！連珠傾全力辦學，以校為家，往往數年不同

里門。愛護學生有猶子弟，親授修身課，示以立身行己之道。教室齋舍，躬親巡視；有患病者，顧撫周至。發行校刊曰「華興」，凡佳文、心得、活動，胥載登；學生觀摩切磋，爭自奮厲向上。注意課外活動，令學生組織「自治團」，以「忍苦、耐勞、習勤、養勇」為團訓。團長、組長率由選舉，負校中清潔、衛生、自修、風紀等任務，自發自動，成績斐然。至各處升學就業者，則組織分團，與校園本部密切聯繫，沉潛一氣。即留學英、美、德、法、西、義、日等國者亦然。故學生感應道交，矩矱服膺，無間終始內外。又組織「互助會」，釀集基金，輔助清寒上達，薄俸所入，多挹注於此。濟濟踴踴，造就滋衆，如陷大陸之何思源、張含英、王近信、龐鏡塘，來臺之劉道元、李文齋、杜光瑱、王壽如、楊展雲、賈崇言、朱世蘭、連退庵、靳鶴聲，咸稱魯西六中之高弟焉。

璉珠樸厚忠淳，樂羣敬業。言教身教，相得彌彰；模楷師儒，口碑載道。學生尊之敬之，固若喬嶽；而遇其親族，亦每殷重為禮。某次大宴會，匪突劫擄，後知中有璉珠，亟謝罪，立即護送回，類黃巾之拜高密。德化行感，懿歟尙矣！民國二十九年庚辰某月，疾歿濟南寓所，年七十。家僅遺薄田數畝，老屋數間。夫人氏陳，稱賢助，使無內顧慮。子樹光，清華大學出身，留學日本。長女樹嫻，亦留日，適孫東生。次女樹某，適韓淇瞻。

（本靳鶴聲：先師叢丕先生事略，叢樹森：族叔丕生公教育事蹟、賈崇言：叢校長軼聞。）




# Hotel Fortuna

九龍彌敦道 355, Nathan Rd, Kowloon, tel: 3-851011

# Fortuna Court Hotel

九龍志和街 2-6, Chi Wo St, Kowloon, tel: 3-304321



富都大酒店

客房300間  
一流設備  
舒適雅潔  
收費廉宜



富都閣酒店

cable: 'HOTELFORTUNA' H.K.  
telex: HX74897